

# Dat kann well anners naracken


Menno harr tohuus maal weer uprüümt un alls mooi schier maakt. Sien Auto was bit boven hen mit de hele Strunt vullpakt, waar he nix mehr mit anfangen kunn of wull. Daarmit hett he sükdenn up de Padd na de Müll-Sammelstee maakt.

Nadeem he daar twintig Euro för 't Anlevern betahlt harr, hett he sien Ofgefall ördentlich entsörgt. Akkraat sorteert na Holt, Kunststoff, Metall un Huusmüll. Un de halvvulle Farvemmers hett he vördeem, natürelk na Vörschrift, as Sondermüll anmeldt.

In sükse Saken is Menno genau, en süvern Umwelt steiht bi hum hoog in de Reiken. Ok sien Oldglass sorteert he na de Farven witt, gröön un bruun un smitt dat eenmaal in de Week in de richtige Containers. He kann de Lüü neet verstahn, de sük neet mit Mülltrennung befaaten un de so doon un leven, as wenn hör daar heel un dall nix van angeiht.

So, as de ollerde Radfahrer, de alltied van tohuus na de Hauptstraat fuhr un daar bi de Bushaltestee sien vulle

## KOLUMNE



## Platt maakt

Müllpüüt in de lüttje Mülllemmer quetskde un verswinnen leet. Of de junge Frau mit hör Bollerwagen, de daagsover, sünnner Bedenken, twee blaue Müllsacken eenfach up de Parkplatz vör de Containers för Oldglass ofstellde. De blot hör Schullers hoogtruck, schüddkoppde un eenfach wiederleep, as se van Ogentügen daarup anproot wurr.

Menno begrött 't ja, to versöken de egen Barg Müll, de alltied anfallt, sülvst to minneseren, man doch neet up so en Aard un Wies. Man kann dat doch neet de Allgemeenheit unnerschuven un de daar denn mit sitten laten. Daarum kann he ok de stevige Keerl neet vergeten, de

heel verfehrt keek un fell utnaihde, as Menno tofällig mitkreeg, dat de sien Paar ofle Gummistevens in de Container för lüttje, elektroniske Delen steken wull.

Menno begrippt sükse Minsken eenfach neet. Utwussen Minsken, de hör Ofgefall eenfach ofstellen, liggen laten of enerwaar in de Natuur verstreien. Waarum maken de sük overhoopt de Meite, hör Struukwark, Bauschutt un deelwies so gaar elektriske Gereedschuppen in de Hammerk to sluren, wenn man de meestieds ok bi de Müllplatz umsünst ofgeven kann? Hebben de keen Nood, dat se daar maal bi sehn un ördentlich verdönnert worden? Sünd wi Minsken intüken in enig Dingen würkelk so gliiekgültig worden? Is uns dat nettgliiek, wat de annern doon of laten?

Mennigmaal is Menno raadlos.



Karlheinz Harms